

Gij Goj Byacwx

大 明 山 的 故 事

Byacwx youq laeng Baihdoengbaek Vujmingz, vunz heuhguh “bya gyaеu baihnanz, diegsien gwnzbiengz”, dwg ceh cawndongq heu laeng gwnz bwzveizgveihsen. Gij swhyenz doenghduz doenghgo de lai raeuh, funghgingj hix ndei, “dujva seizcin、raemxgienghdat seizzah、fwjmok seizcou、nae seizdoeng” dwg gij gingisaek seiq geiq de. Hwnj sang dawzneuz, bya goengq dem goengq humxhob, fwjmok geujheux, mbangj-baez nditndat cik daengz fwjmok, lij cik ok gvaengxrongh miz saek daeuj, caemhcai miz “gvaengxrongh riengz vunz doeng, duzngaеuz youq ndaw gvaengx” gij gingisiengq geizheih neix dem.

Bonj saw geiq gij lizsij Vujmingz Yen sij naeuz, Byacwx “goengqbya ceiq sang de heuhguh ‘Mozyez’, dawzneuz gizgyae. Hwnj gwnz sang bae, bya goengq dep goengq. Giz gemh miz aen diegdangz gwnz mbwn ndeu, bet ndaek rinsangj, caet aen rincauq, cenghseuq mbouj miz ngawhrin, seiqhenz doengh gocaz geq” mwncumcum, neix couh dwg ‘hawsien’”. Gij neix dwg gangj bet aen diegdangz gwnz mbwn laeng Byacwx. Gwnz-biengz ciengz naeuz gizde dwg gizdieg fangz-baed iu’ gvaiq、bouxien Bouxcuengh gaеuqgeq doenghbaez ciengzseiz doxcomz couh baenz haw de.

Gij ciengzgangj Byacwx gig lai, gij goj Daeggud dwg ndawde aen haemq mizmingz ndeu. Cingciuz 《Dozgingh Vujyenz Yen》 gienj daihsam geiq miz: “Miuhyahlungz laeng lajmbanj ndaw-yienh raen lai raeuh.” Daj gij saw neix couh rox, youq Cingciuz couh seizhwng buizcae q Yahlungz. Cienz naeuz, daj hauilai nanz gaxgonq, youq aen mbanj laeng laj din Byacwx miz yahmaiq gungzhoj ndeu. De ciengzseiz bae gwnz ndoi vat byaеkcwx. Miz baez seizdoeng nitnit, de bae ndoi ma ranz, raen duz ngwz iq maj ndaej gig geizheih ndeu, duz de youh rox rongh dem. Duz ngwz iq gutgungq youq henz roen, yaek dai lo. Yahmaiq gig hojlien de, couh dawz duz de gip ma ranz cuengq youq henz cauq bangh raeuj, gueng duz de gwn doxgaiq, duz ngwz iq neix couh menhmenh ndei lo.

Yahmaiq ciengx duz de youq ranz, dangq bouxlwg swheij nei bae ganq duz de. Duz ngwz menhmenh maj hung le, aen ranzhaz Yahmaiq gaenq cang mbouj roengz de lo, diuz rieng de iet okrog bae baenz dingzlai. Yahmaiq naeuz duz

ngwz gangj, donj ok hoh ndeu diuz rieng cij mbouj rox bienq raez. Duz ngwz ngaekgyaeuj lo, Yahmaiq couh aеu caxbyaеk raemj ok gyaengh rieng iq. Duz ngwz de couh mbouj miz byairieng lo. Vahcuengh heuhguh “gud”. Yahmaiq couh an coh “Daeggud” hawj de, vunzmbanj couh ciuq gvenq heuh Yahmaiq guh Mehgud.

Diuz rieng Daeggud yienz naeuz mbouj rox bienq raez, hoeng aen ndang lij ciemh baez ciemh hung, de yied gwn yied lai, ranzhaz cungj yaek deng de caenx vaih lo. Yahmaiq ciengx mbouj hwnj le couh dawz duz de cuengq haeuj dah bae, hawj de gag bae ra gwn.

Daeggud deuz le, bakdou Mehgud ciengzseiz sawqmwh miz bya a mak a, vunzmbanj cungj naeuz guj dwg Daeggud soengq de. Gij ndwenngoenz Mehgud ciemhciemh ndei hwnj-daeuj, de caemhcai guhsien, vunzlai cungj gig aеueiq de. Doeklaeng, Mehgud laux le fat bingh couh dai le, vunzmbanj yaek caeuq de guh begsaeh, dumdeng raq rumzhaenq ndeu ci gvaqdaеuj, byajlingh byajraez youh fwndoek. Doq raen ndaek lungz loet ronghgim ronghgim ndeu ngiengx gyaеuj baet rieng daj gwnz mbwn mbin roengzdaеuj, dawz Mehgud ram daengz Byacwx bae haem lo. Daj neix doxbae, vunzlai caemh heuh goengq bya de guh Mohmehgud.

Mehgud roengz namh le, Daeggud bibi sam nyied sam gonqlaeng cungj mbin daengz Byacwx sauq moh Mehgud. It baez de sauqmoh ne, Byacwx couh rumz ci fwn doek, byajraez rumx-rumx. Fwn doek dingz le, megbya Byacwx couh dauqcawq miz raemxgienghdat cung doxroengz, vunz cungj naeuz neix dwg diuzdiuz ciengqhau Daeggud caeuq daxmeh venj de. Doengxhaemh raemxgienghdat raemx bongh rumxrumx dwg Daeggud guh aen yizsiz “nauh dienlungz” caeq mehciengx. Ndigah, gyoengqvunz youq laeng seiqhenz Byacwx ciengzseiz naeuz “dai cij ram hwnj Byacwx bae” coenz vah neix, couh dwg miz vunz dai le, Bouxcuengh dieg de couh cingj goengdauh caeuq goengsae bae niemhging guhsang, dawz bouxdai haem youq Byacwx couh dwg soengq gij hoenz de ma Byacwx goengq byasaenz cojgoeng neix, neix couh dwg “hoenz dauq Byacwx”.

(Swliu daj gwnzmuengx aеu, gij doz daj gwnzmuengx Byacwx Gvangjsih aеu.)



▲Aen bakdou diegbaeyouz Byacwx.



▲Seizdoeng doenghgo giet naehang.



▲Aen miah gwnz bya.



Seizcou, ndaw lueg fwjmok lai.